

21/11/2003

Usul Dr M lulus

Minarni Mat Saad

DEWAN Undangan Negeri semalam meluluskan usul merakamkan ucapan terima kasih kepada bekas Perdana Menteri, Tun Dr Mahathir Mohamad dan menyatakan sokongan penuh atas pelantikan Datuk Seri Abdullah Ahmad Badawi sebagai Perdana Menteri kelima.

Menteri Besar, Datuk Seri Dr Mohamad Khir Toyo, ketika membentangkan usul itu, berkata Dr Mahathir berjaya membawa Malaysia menjadi negara contoh dari segi kestabilan politik, kemakmuran ekonomi, perpaduan kaum dan toleransi beragama.

"Dr Mahathir berjaya meletakkan Malaysia ke tahap diiktiraf sebagai negara Islam progresif paling maju serta negara perdagangan ke-18 terbesar di dunia.

"Beliau juga mampu menggariskan wawasan jangka panjang untuk menjadi sebuah negara maju menjelang 2020. Dr Mahathir bukan saja mempunyai wawasan, malah kesungguhan memastikan wawasannya menjadi kenyataan. Ini beliau laksanakan dengan membina dan menyemaikan rasa keyakinan diri, kebanggaan nasional dan semangat kenegaraan yang jitu di hati rakyat," katanya.